

”

*PENA OBEISSANCE SI DIRE*

*OU DESOBEIR ALLAH*

*BIZIN OBEIR*

*SEULEMENT CEKI MA'ROOF*”

(Le Saint Prophète Mohammad <sup>saw</sup>)

Par

Imam Zafrullah Domun

Du

JAMAAT AHMADIYYA AL MOUSLEMEEN

ILE MAURICE

Mo commencer avec le Nom d'Allah, Le Gracieux Le Miséricordieux. Mo faire So Eloge et mo cherche So l'Aide et mo demande Li pou envoie So bannes bénédictions choisies lor le Saint Prophète Mohammad<sup>saw</sup> (570-632) et aussi lor So Messie Promis Hazrat Mirza Ghulam Ahmad<sup>as</sup> (1835-1908). Mo souhaite la paix à tout bannes dimounes ki pou lire sa ti livret la.

Ca faire ene bon moment depuis ki nous, bannes membres du Jamaat Ahmadiyya Al Mouslemeen fine trouve nous dans le besoin pour organise nous dans ene nouveau Jamaat. Mais nous déclarer ki nous continuer poursuivre les objectifs de Hazrat Masih Maood<sup>as</sup>. Nous toujours prêts pou prouver ki tout ceki nous dire et nous faire li baser lor les enseignements du Saint Coran et les enseignements du Saint Prophète Mohammad<sup>saw</sup> tel ki fine expliquer par Hazrat Masih Maood<sup>as</sup>.

Depi quelques semaines nous trouver ki ena ene effervescence parmi bannes membres de l'Ahmadiyya Muslim Association de l'Ile Maurice. Nous conner ki bannes dirigeants de ça l'association là prétende ki zotte représente les enseignements de Hazrat Mirza Ghulam Ahmad<sup>as</sup>, le Messie Promis et Mahdi. Mais d'après ceki nous fine capave constater bannes dirigeants de ca l'association là zotte bannes actions bien loin avec bannes nobles enseignements de Hazrat Mirza Ghulam Ahmad<sup>as</sup>. Zotte essaye faire bannes dimounes croire ki zotte content la paix et zotte promouvoir la paix dans la société. Mais la vérité c'est ki zotte finne vinne banne maitres pou détruire la paix et zotte finne vinne banne promoteurs de la haine dans la société. Et tout ça là zotte pé faire avec les bénédictions de zotte calife, Mirza Masroor Ahmad dans Londres.

## **GROS MENSONGE**

Raison de ça l'effervescence qui pé anime l'association ces jours ci c'est ki mo fine écrire ene lettre dans Weekend 24 Octobre 2010 pour dénonce certains de zotte bannes mensonges. Mo ti fine expliquer ki l'association et so bannes représentants pé continuer colporte ene gros mensonge à travers le monde quand zotte pé rode faire dimoune croire ki ena 200 millions Ahmadis à travers le monde. Mo fine dire ki ça

chiffre là li faux et le nombre de banne Ahmadis dans le monde li pas dépasse peut être 10 millions. Mais bannes la pas pé conner ki pou faire parceki zotte conner ki pena auquene statistique pou soutenir ceki zotte dire. Alors zotte reponne et zotte dire ki dans le monde ena tellement beaucoup dimounes ki pé rentre dans le Jamaat ki nepli capav compte zotte nombre ! Alors bannes représentants de l'association finne abaisse zotte à ça niveau là pour justifier l'injustifiable et défanne zotte calife so bannes déclarations fausses et essaye à tout prix de faire bannes les autres dimounes croire ça.

## **PRATIQUES NON ISLAMIQUES DENONCES**

Mo ti fine aussi denonce zotte l'hypocrisie concernant zotte slogan "love for all hatred for none" ki zotte faire croire ki zotte pratiquer. Mais dans l'association zotte fine faire tout pou divise bannes familles en morceaux pou ki zotte capav faire zotte bannes magouilles. Les dirigeants de l'association incluant l'amir, le missionnaire en charge et le cercle rapproché de bannes membres du Amla fine amène ene campagne pour répandre la haine et tuer l'amour parmi bannes membres du Jamaat. C'est cela zotte lourd fardeau ki zotte tous pou bizin charrier le jour du Jugement cotte zotte calife pou tellement occuper avec so propres problêmes et li pas pou capav faire nanrien pou zotte. Ensuite mo ti aussi denonce couma zotte fine faire Hazrat Ahmad<sup>as</sup> vine le dernier prophète selon ene logique ki seulement zotte tout seul comprend. De plus mo ti cause aussi lor couma pena auquene liberté d'expression dans le Jamaat Ahmadiyya et couma ena ene abus pou mette dimoune en dehors du Jamaat en ignorant les règlements de l'association. Mo fine aussi dire ki le calife dicter so la loi lor bannes Ahmadis dans l'Ile Maurice laïque. Ainsi le Jamaat ignore bannes la loi du pays et li faire ceki li envie.

## **LA CONTRE ATTAQUE**

Alors la machine de propagande du Jamaat fine mette li en marche pour contrecarrer ça bannes z'affaires ki mo ti pé dire là. L'amir fine saisir l'occasion dans Ijtima Khuddam pou brosse ene tableau de ceki finne arriver en l'an 2000 et couma fine mette nous en dehors du Jamaat. So missionnaire en charge Maulana Basharat Naveed aussi fine causer. Tout de suite après fine ena ene picnic cotte bannes

Ansars fine gagne l'occasion pou promener et là aussi fine reponne à zotte bannes questions très vaguement. Ensuite fine ena l'ijtema Ansar cotte certains de bannes orateurs finne faire bannes discours pou faire dimounes rier et croire ceki pas exister. Pour combler le tout le journal mensuel "Le Message" de Novembre 2010 aussi fine écrire ene éditorial pou dire bannes dimounes ki zotte bizin obeir zotte amir en toute circonstance. Fine cite bannes hadices pour faire dimounes comprend ki zotte bizin écouter et obeir, prend patience et faire do'a. A part ca zotte pas gagne droit faire nanrien.

D'après ceki mo finne appranne mo comprend ki ça bannes discours la pé fer pour lave cerveaux de bannes dimounes pou zotte gagne peur et zotte reste en place et zotte pas fer auquene efforts pou essaye conne la vérité lor ceki nous pé dire. Mo finne déjà lance zotte ene défi pour prouver ki bannes affaires ki mo pé dire fausse, mais ziska l'ère personne pas finne vine de l'avant pour faire ça travail là.

## **L'EXEMPLE DE L'EX AMIR**

Dans ene discours mo appranne ki fine aussi donne l'exemple d'ene ex amir du Jamaat. Selon l'orateur ça amir là ti ene exemple de soumission au *nizâmé* Jamaat. Aussitôt ki le calife finne sanctionne li, li fine présente so excuse sans condition au calife. Et so récompense à cause de so soumission le calife de l'époque fine faire li vinne l'amir du Jamaat quand avant li ti seulement le president. Chaque dimoune faire selon so conscience. Ça amir ti trouver ki li ti bizin agir couma li fine agir. Tant mieux pour li. Quant à moi mo ti pou montrer moi infidèle pas à ene calife mais à Allah si jamais mo ti tourne le dos avec So bannes signes pour mo plaire le califes bannes les autres dimounes. Ena dimoune content plaire dimoune. Mais moi mo fine appranne ki Allah ena priorité lor tout. Mo pena auquene droit pou désobéir Allah et obeir ene dimoune même si li appelle li ene calife ! Et par la Grace d'Allah jamais mo fine regrette décision mo fine prend. La crainte d'Allah fine délivrer nous de la crainte de tout autre ki Allah.

## **NOUS PEUR SEULEMENT ALLAH**

Mais nous, nous type dimoune ki "*quand dire zotte le monde pé rassembler contre zotte donc gagne peur banne là, ça augmente zotte la foi et zotte reponne Allah suffit pou nous et Li Le meilleur des Gardiens*" (3 :174). Et donc nous pas peur personne à part Allah et nous conner avec certitude ki bannes ki contre nous pas pou capave faire nous auquene du mal si Allah pas autorise ça. Et nous soumette-nous à Li. Bannes intermédiaires pas pou capave faire nanrien ladan. A plusieurs reprises Allah fine dire moi couma li ti dire Hazrat Masih Maood<sup>as</sup> « *Alaysallah be kaafin abdahou, Innallah ma'aka , Innallaha ma'a ahleka* ou bien *hasbekallahou wa manit taba'aka menal mo'meneen* ". Traduction de ça bannes paroles li comme suit : "Eski Allah pas suffit pou So serviteur !; Allah avec toi; Allah avec to bannes proches; Allah suffit pou toi et bannes ki suivre toi parmi bannes croyants". Donc par la Grace d'Allah nous cause avec certitude ki Hazrat Masih Maood<sup>as</sup> ti dire ki so bannes suivants bizin enan. Les autres pé cause seulement avec bannes suppositions. Avec l'esprit ki Allah fine donne ou li facile pou faire la différence.

## **INNI MA'AKA YA MASROOR**

Mo appranne aussi ki fine aussi causer pou faire dimoune comprendre ki révélation de Hazrat Masih Maood<sup>as</sup> "*Inni ma'aka yaa masroor*" applique lor le cinquième calife Mirza Masroor Ahmad. Li dommage ki dans Jamaat Ahmadiyya ki ena ene riche héritage de révélations de la part d'Allah pé bizin servi bannes méthodes pareils pou justifier ceki pas justifiable. Bizin ki ou l'ignorance de la littérature du Jamaat Ahmadiyya li bien profond pou ou prend bannes positions pareil. Mais li pas étonnant ki ene telle ignorance pé prévaloir autant parmi bannes membres du Jamaat. Mo challenge n'importe kikene parmi bannes Ahmadis ki li apporte ene déclaration de la part de Mirza Masroor Ahmad cotte li dire ki ça révélation là applique lor li. Jamais li fine faire ene déclaration pareil parceki li conne très bien ki pou so conséquence si li faire ene déclaration pareil sans ki li fine gagne ene ti indication de la part d'Allah. Mais par contre moi mo fine déjà dire et mo redire ki Allah fine donne moi ça révélation là en tant ki serviteur de Hazrat Masih Maood<sup>as</sup>. Alors bannes soi disant oulémas dans le Jamaat ki pé faire azordî. Celui ki pas fine recevoir révélation

zotte envi attribuer ene révélation à li. Celui ki fine recevoir révélation là zotte rejette li. Et zotte appelle zotte bannes suivants de Hazrat Masih Maood<sup>as</sup>! Suivants de so bannes ennemis nous capave accepter zotte été, mais pas du tout so bannes suivants ki pé garde so bannes enseignements.

## **BANNES DIRIGEANTS IGNORANTS**

Et dans bannes livres hadices ki le prophète fine dire nous de ça bannes qualité oulémas là. Mo pou cite ene deux hadices lor ça sujet là. Dans Bokhari rapporter ki le Saint Prophète Mohammad <sup>saw</sup> fine dire :

« Ene de bannes signes de l'approche de l'Heure c'est la disparition de la connaissance et la prévalence de l'ignorance"

"Allah pas enlève la connaissance de la loi et la foi Islamique en retirant bannes livres de So bannes serviteurs. Li enlève li à travers la mort de bannes savants. Quand bannes savants morts le public faire bannes dimounes ignorants vinne zotte chefs; Quand pose ça bannes chefs là questions zotte reponne sans auquene connaissance. Zotte mal guidés et zotte mal guide les autres."

Ene Ahmadi simple enan pou pose li ene deux questions et facilement li pou trouver ki ça bannes dirigeants Ahmadiyya de nos jours dans ki catégorie zotte trouve zotte. Eski zotte pé guide bannes dimounes selon le Livre d'Allah ou bien zotte pé faire bannes affaires selon zotte propre pensée et zotte pé mette dimoune dans l'erreur. Alle pose ene deux questions lor bannes mariages, la mort et bannes relations familiales et ou à propos vraie signification de khilafat, a propos de l'arrivée de bannes dimounes après Hazrat Masih Maood <sup>as</sup> et ou pou comprend ki distance fine éloigner avec le droit chemin. Et pas penser ki mo pé pense seulement de l'amir et so clique dirigeante minoritaire mais surtout mo pé cause du calife Mirza Masroor Ahmad et so l'équipe dirigeante. Ça faire plis ki un an mo fine pose li huit questions et jusqu'à azordi ni li ni so amir ni so missionnaire en charge ni so bannes oulémas pas fine capave reponne.

## **EDITORIAL LE MESSAGE DE NOVEMBRE 2010**

Mo fine dire au début ki tout pé faire azordi jours pou faire bannes dimounes arrête dire de mal pou zot cher amir saheb. Alors ene de banne organe de propagande du Jamaat, le journal Le Message so éditorialiste fine cite bannes hadices pou faire bannes membres comprend ki zotte bizin obeir zotte amir saheb dans toutes les circonstances ki zotte content ou bien pas content, ki zotte dans difficulté et zotte dans bien. D'après bannes hadices ki fine citer obéissance à l'amir saheb li absolument nécessaire. Et si ou éloigne ou ene tigitte du Jamaat ou pou mort dans l'ignorance. Ça bannes hadices ki fine citer là trouve dans Bokhari et Muslim.

Dans le passée dans plusieurs de mo bannes sermons de Vendredi ou capave lire ki mo fine dire ki le Jamaat Ahmadiyya dans so l'ensemble dans l'ignorance. Pour maintenir ene system en place bannes chefs du Jamaat commencer par le calife, Sadr Anjuman Ahmadiyya, l'amir du Jamaat local et bannes ki soutenir li dans le Majlis Amla, le missionnaire en charge et bannes les autres missionnaires aussi, bannes Sadrs (hommes et femmes), bannes ki écrire bannes articles ou bien bannes livres ou bien responsables de bannes publications et bannes ki faire causerie, zotte tous ensemble cachiette la vérité à bannes membres du Jamaat. Selon le Hadice du prophète "zotte pas bien guidés et alors zotte mal guide les autres." Petit à petit zotte tous ensemble parceki zotte envie maintenir ene système ki pé écrouler zotte ignore les vrais enseignements de l'Islam et du Saint Prophète<sup>saw</sup> pou faire bannes dimounes croire bannes enseignements ki fausses.

## **OBEISSANCE ABSOLUE A AMIR**

Depi nous l'enfance dans bannes fonctions du Jamaat ki nous finne assister fine gave nous avec ene régime d'obéissance à bannes ki dans l'autorité surtout le calife et l'amir. Alors souvent nous finne tanne bannes hadices tel qui le Saint Prophète finne dire "celui ki obeir mo amir obeir moi ; celui ki désobéir mo amir désobéir moi". Pou mette l'emphase lor obéissance du amir encore finne faire nous tanne à plusieurs reprises "bizin obeir ou amir même si li ene esclave Ethiopien et so la tête grosseur ene raisin".

Alors azordi jour quand certains de bannes Ahmadis commence pose questions à propos boycott social ki l'association et so bannes membres finne exercer lor bannes membres du Jamaat Ahmadiyya al Mouslemeen et suivant ceki nou finne dénoncer lor l'article Weekend la direction du Jamaat pé faire tout pou faire bannes Ahmadis croire ki décision faire boycott, pas faire salaam, casse bannes relations familiales, prend bannes les autres dimounes zotte droits, faire chantage pou faire pression, tout ça là permis dans l'Islam selon l'interprétation actuelle de bannes dirigeants soi disant Ahmadiyya. Quand ou analyse noblesse de bannes enseignements de Hazrat Mirza Ghulam Ahmad<sup>as</sup> et le comportement irresponsable et anti-islamique de bannes dirigeants actuels de la Jamaat Ahmadiyya li facile pou ene dimoune ki ena la crainte d'Allah dans so le cœur pou faire la différence. Azordi jour bannes dirigeants Ahmadiyya pas représente les enseignements de Hazrat Masih Maood<sup>as</sup>. Zotte pé suivre façon de faire ki prévaloir dans la culture indo pakistanaise ki pena nanrien à faire avec l'islam. Et ene groupe de Mauriciens Ahmadis ki content faire du mal aux autres penser ki zotte pou rentre dans Paradis avec bannes enseignements pareils et alors zotte pé maintenir ça bannes façons de faire là.

## **ENSEIGNEMENTS CORANIQUES**

Aster mo pou cite ou ene deux versets coran et ene deux hadiths pou prouver dans ki qualité erreur bannes dirigeants Ahmadiyya trouve zotte azordi.

Pour commencer dans le Saint Coran Allah dire :

Assurément Allah ordonne zotte ki zotte remettre bannes charges a banne dimoune ki digne pou prend ça bannes charges là. Et quand zotte juge parmi bannes dimounes zotte juge avec justice. Et ceki Allah ordonne zotte pou faire li excellent. Allah tanne tout et Li trouve tout. (SC 4 :59)

En d'autres mots Allah dire ki bannes croyants bizin élire bannes dimounes capables pour dirige zotte bannes affaires. Et quand ou enan pou choisir ou bizin faire preuve de justice. La justice exiger ki ou bizin choisir le plus compétent et non pas ene quelqu'un ki ou camarade ou bien ou proche ou ene membre de ou famille. Alors faire

attention ki ou alle choisir ene dimoune ki so la tête couma ene la grain raisin. Si ou finne faire ene tel choix alors ou pou bizin subir les conséquences de ou action parceki ou pas finne suivre les conseils d'Allah. Et si Allah dire bannes croyants pou choisir alors personne pas gagne droit change le choix de bannes croyants à moins ki li alle contre les commandements d'Allah.

## **ECRASEMENT DE LA JUSTICE**

Dans ça verset là Allah dire observe la justice. Et nous conner ki ena plusieurs les autres versets dans le Saint Coran cotte Allah faire nous comprend ki en tant que musulman nous bizin être juste dans nous bannes façons de faire. Dans l'association Ahmadiyya de l'Ile Maurice ça valeur là fine systématiquement fouler en bas li pied. Ainsi nous fine trouver ki certains bannes dimounes pas finne gagne auquene droit pou défanne zotte contre certaines accusations. Ena les autres finne coquin zotte droits pou promouvoir bannes ki proches et finne retire manger depi dans zotte la bouche. Dans l'association la justice fine tellement bafouer ki pou trop longue pou faire la liste.

Dans le Saint Coran Allah dire nous :

"O bannes dimounes ki finne croire ! Obeir Allah et So Messenger et bannes ki ena l'autorité lor zotte. Et si zotte pas d'accord lor quelque chose réfère li à Allah et à so Messenger si ou croire dans Allah et le dernier jour. Ça li plis bon et zotte pou gagne meilleur interprétation (SC 4 :60)

Ça verset là fer nous comprend ki nous bizin essaye résoudre nous bannes différences en cherchant les instructions d'Allah dans le Saint Coran et le sunnat de So Messenger. D'après le Saint Coran différence parmi bannes Musulmans résoudre par le dialogue pou mieux comprendre ceki Allah et So Messenger fine dire et faire. Nanrien pas résoudre par le boycott social et l'exclusion. Le boycott social ti pratiquer par bannes ennemis de bannes prophètes et azordi bannes Ahmadis finne adopter ça sunnat là. Et après zotte pé dire ou ki zotte pou convertir le monde à l'Islam ! De quel Islam zotte pé causer : L'islam du Saint Prophète ou bien l'Islam ki zotte pé pratiquer par ignorance, mesquinerie et animosité personnelle.

## OBEISSANCE DE LAMIR ET DU CALIFE

Bannes mots exactes des hadices de l'obéissance à l'amir li comme suit :

**"Si finne mette ene esclave comme chef lor zotte et li dirige bannes affaires selon le Livre d'Allah alors zotte bizin écouter et obeir. Dans ene l'autre version de ça hadith là ena mention d'ene esclave Ethiopien et enan défaut ou bien blessures dans so le corps. (Mousslim H 1836).**

Dans ene l'autre hadice raconter lor l'autorité de Hazrat Ali <sup>ra</sup> et li dire :

**Le Saint Prophète <sup>saw</sup> ti envoie ene expédition et li ti nomme ene dimoune parmi bannes Ansar comme chef. Quand li finne faire nomination là li finne dire bannes dimounes sous so commandement ki zotte bizin écoute li obeir li. Quand bannes là finne aller zotte finne faire zotte chef en colère. Alors le chef finne ordonne zotte pou ramasse du bois et pou allume ene difé. Ensuite li finne demande zotte pou saute dans ça difé là. A ça moment là celui ki pé raconte ça hadith là dire ki nous finne commence guette nous bannes camarades avec étonnement ( a cause de ça instruction idiot là). Nous ti éloigne nous de difé en acceptant le Saint Prophète et maintenant nous chef pé dire nous rentre dans difé. Zotte pas finne dire nanrien ziska ki so colère finne passer et difé finne teigne. Quand zotte finne retourner zotte finne raconte ça incident là au Saint Prophète et li finne dire " Si zotte ti écoute li et zotte ti rentre dans ça difé là zotte ti pou reste là dan pour toujours. Bizin obeir seulement dans ceki *ma'roof* ( c'est-à-dire ceki bon et raisonnable). Dans ene l'autre version de ça hadith là raconter ki le Saint Prophète <sup>saw</sup> finne dire "*Laa ta'ato fil mar'siaatillah innamat ta'ato fil ma'roof*" ki veut dire " Pena auquene obéissance dans la désobéissance d'Allah ; bizin obeir seulement dans ceki bon et raisonnable "(Mousslim H 1840R1)**

De la même façon nou trouve dans ene l'autre hadice ki ene compagnon raconter ki quand le Saint Prophète <sup>saw</sup> ti fer bai'at avec nous li ti demande nous pour promette bannes affaires suivants : nous pou écouter et obeir dans l'adversité et l'aisance dans le plaisir et le malheur et ki nou pou toujours dire la vérité en ceki concerne Allah

sans aucune crainte de ceci les autres capav reproche nous. (Mouslim Volume 6 page 241)

## COMMENTAIRES LOR CA BANNES HADICES LA

Quand nous lire ça bannes hadices ki considérer comme authentiques, Nous comprend bannes affaires suivantes :

1. Bannes instructions de l'amir bizin selon le Livre d'Allah. C'est-à-dire l'amir en question même si so li ene esclave et so cerveau pas plis gros ki ene raisin so bannes instructions bizin d'après bannes commandements d'Allah tel ki nous comprend li dans le Saint Coran et le sunnat du Saint Prophète Mohammad<sup>saw</sup>. Alors l'amir en question bizin ena connaissance du Saint Coran pour ki li capav exerce l'autorité lor bannes musulmans.
2. N'importe ki instruction ki ou capav recevoir et ki contredire le Livre d'Allah bizin rejeter pareil couma ene dimoune jette bannes kikchose ki pas bon et malpropre.
3. Si jamais ene musulman obeir ene instruction de so calife ou amir ki contre les enseignements du Saint Coran li pé désobéir Allah et so Prophète<sup>saw</sup>.
4. Bizin obeir dans tout kikchose ki *ma'roof* (bon et raisonnable).
5. Pas bizin peur personne quand ena pou dire la vérité pour la cause d'Allah et pas bizin peur reproche de bannes dimounes.
6. Pena auquene obéissance si pé dimanne ou pou désobéir Allah !

Aster nous guette ene coup combien instructions du calife et de so amir ki pé pratiquer dans Maurice contre le livre d'Allah. Parmi ene longue la liste mo mentionne seulement les cinq suivants :

### 1. Boycott Social Anti Islamique

Pena auquene verset du Saint Coran ni ene hadice ki permette le boycott sociale d'ene groupe Musulman. Alors bannes ki pratique ça avec ferveur pé désobéir Allah. Dans Maurice majorité bannes Ahmadis ki pratique le boycott sociale pé plaire zotte calife et zotte amir mais zotte tous pé désobéir Allah et So Prophète. Ena certains missionnaires du Jamaat à Maurice ki dire ki l'Islam permette le boycott sociale. Mo finne déjà dire ca dans le passée et mo répète li. Si ça bannes missionnaires là honnêtes dire zotte mette zotte l'opinion

lor papier et publier ceki zotte pé si zotte penser ki zotte conne quelque chose de l'islam !

## **2. Casse Relation Familiale Anti Islamique**

Le Saint Coran rempli de bannes versets ki faire nous comprend ki nou pas gagne droit casse nous relations familiales avec nous bannes proches. Mo cite seulement deux versets. Allah dire :

"Eski si nou pou place zotte en autorité zotte pou faire désordre lor la terre et zotte pou casse zotte relations familiales ? C'est ça bannes dimounes là ki Allah finne maudire et finne faire zotte sourds et aveugles."(SC47 :23-4)

Ça verset là fer nous comprend **ki Allah finne maudire bannes dimounes ki en autorité et zotte casse relation familiale**. Alors tout bannes dimounes ki pé obeir le calife et l'amir mais en même temps pé désobéir Allah, Allah pé dire So malédiction lor zotte !

## **3. Pas Faire Salaam Anti Islamique**

Dans le Saint Coran Allah fine dire nous ""Et quand faire ou ene salutation reponne avec quelque chose de meilleur ou bien ou moins reponne avec ene salutation ki similaire. Assurément Allah prend compte tout ceki zotte faire"(4 :87). Et nous conne très bien ki enan plusieurs hadices cotte le Saint Prophète finne dire ki bizin échange salaam parmi les musulmans pour élimine l'ennement. Mais l'aveuglement de bannes Ahmadis dans Maurice li tel ki zotte pas reponne salaam. Ena bouche zotte zoreils. Ena vire figure. Ena reponne "corek ça". Ena refuse ou la main catégoriquement ! Ena présente ou zotte coude ! Ça c'est l'état de bannes dimounes ki dire ki zotte pou enseigne les autres dimounes couma pou pratique Islam. Grand merci à Allah ena bannes les autres musulmans ki conne vrai valeur salaam !

## **4.Reprend Ene Invitation Anti Islamique**

Le Saint Prophète<sup>saw</sup> finne enseigne nous ki "si nous donne ene dimoune ene cadeau et nous reprend li de ca dimoune là nou pareil couma ene li chien qui avale so vomis.". Mais dans Jamaat Ahmadiyya dans le passée et azordi aussi le amir, pensant ki li bizin plaire so calife mais pas Allah li finne oblige plusieurs Ahmadis pou alle

reprend bannes cartes d'invitation ki zotte finne donne zotte bannes frères et sœurs dans Jamaat Ahmadiyya Al Mouslemeen. Ainsi ça amir là impose lor bannes Ahmadis pou zotte délaïsse le sunnat du Saint Prophète Mohammad<sup>saw</sup> et pou adopter so propre sunnat et sunnat de so bannes camarades de Londres.

### **5. Dire Ceki Ou Pas Faire Anti Islamique**

Dans le Saint Coran Allah dire nous : "O bannes dimounes ki croire ! ki faire zotte dire ceki zotte pas faire ?. Assurément Allah bien pas content ki zotte dire bannes affaires ki zotte pas faire"(SC 61 :3-4) Le Jamaat rode faire bannes les autres dimounes croire ki li promouvoir la paix et l'harmonie et li dire ki so devise c'est " l'amour pour tous et la haine pour personne !" Mais pou bannes dimounes ki conne le Jamaat de l'intérieur zotte conne très bien ki ça slogan là li sonne fausse. Parski la direction du Jamaat mal guidé par le calife enan ene politique systématique pour promouvoir la haine et étouffe la paix dans la société. Alors le Jamaat contente li pou poursuivre ene politique de division et d'exclusion contrairement à ceki Allah finne dire dans le Saint Coran "Attrape ensemble la corde d'Allah et pas reste diviser...."(3 :103).

### **AMIR ET SO CLIQUE FORCE OU VINNE ANTI-ISLAM**

Alors l'amir avec so missionnaire en charge et so bannes les autres missionnaires, bannes membres du Majlis Amla suivant les instructions du calife pé force bannes Ahmadis pou pratique ça bannes affaires ki contre le Livre d'Allah et la pratique du Saint Prophète<sup>saw</sup> et bannes enseignements de Hazrat Masih Maood<sup>as</sup>. La plupart de bannes Ahmadis, a cause de zotte ignorance, zotte penser ki li zotte devoir pou obeir zotte bannes dirigeants dans ça bannes affaires là et ki si zotte pas obeir zotte pou faire péché. Mais la vérité c'est ki si zotte obeir zotte bannes chefs dans ça bannes mesures ki contre le Saint Coran zotte pé désobéir Allah et so Rasool. Au contraire si ou ene musulman Ahmadi ki ena seulement la crainte d'Allah dans ou le cœur, alors ou bizin gagne le courage pou faire ou bannes dirigeants conner ki zotte pena auquene droit pou exige auquene obéissance dans ça bannes affaires là parski tout ça contre le livre d'Allah. Et bizin obeir seulement dans bannes kikchose ki *ma'roof* (selon les commandements d'Allah).

Ki le mot *ma'roof* veut dire. ? Le mot *ma'roof* d'après dictionnaire "Une approche du Coran selon la Grammaire et le lexique" par Maurice Gloton ena tout bannes significations suivants : "reconnu, illustre, convenable, distingué, bonne renommée, bon usage, bon comportement. Conforme aux usages, le bien". Aster examine ça bannes ordres anti-islamiques de l'amir et guette ene coup si zotte tombe sous ça bannes significations de *ma'roof* ki mo finne donne ou. Pou ena dimoune pou vinne cite ou Hazrat Molvi Nouruddin<sup>ra</sup> pou dire eski ene calife capave donne ene instruction ki pas *ma'roof*? La réponse li oui. Quand ene calife dire ou boycotte ou bannes propres sœurs et frères so l'ordre li contre l'ordre d'Allah et alors li pas *ma'roof*. Quand li dire ou repenne la haine dans la société so l'ordre li pas *ma'roof*. Quand li dire ou alle reprend bannes invitations ki ou finne donner li pas *ma'roof*. Quand li dire ou ki pas pou ena auquene dimoune ki Allah capave envoyer à part le calife li pas *ma'roof* etc. etc.

## **MORT SPIRITUEL POUR BANNES SUIVANTS DE L'AMIR MECHANT**

Dans ene l'autre hadice nous appranne ki Le Saint Prophète<sup>saw</sup> finne dire :

"Dans ene proche avenir zotte pou ena bannes amîrs et zotte pou content zotte bannes bonnes actions et zotte pas pou contents zotte bannes mauvais actions. Pena auquene blâme lor celui ki trouve zotte bannes mauvais actions, et ki fer efforts par la main ou bien so la bouche pou empêche l'amir répète ça bannes mauvais actions là. Pena blâme lor celui ki haïr ça bannes mauvais actions de so amir dans so le cœur mais li pas capav fer nanrien ni avec so la main ni avec so la bouche pou empêche répétition de amir so bannes mauvais actions et li en sécurité contre la colère d'Allah. Mais celui ki approuve bannes mauvais actions (du calife) et du amir et imite ça bannes mauvais actions là zotte morts spirituellement. Bannes dimoune dimanne le Saint Prophète "Eski nous pas bizin lève armes contre ça bannes chefs là ?" Li reponne" Non, aussi longtemps ki zotte continuer faire la prière !"(Mouslim H 1854)."

Alors bannes dimounes ki finne suive aveuglement bannes lordre de zotte calife et amir bizin conne bien cotte zotte finne pose li pied. Zotte bannes parents grand parents pas ti accepter Hazrat Masih Maood<sup>as</sup> pou zotte subir ene sort pareil. Zotte finne accepter Hazrat Masih Maood<sup>as</sup> pour ki spirituellement zotte vivre pour tout le temps. Alors ki kalité malchance finne tombe lor ou ki ou bannes dirigeants mal guidés dirige ou lor bannes chemins ki pou ruine ou spirituellement ! Alors prend konte et faire bien attention et arrête croire bannes dimounes ki envie maintenir ene système en déroute pou zotte continuer fer bannes méchancetés ki ena dans zotte le cœur.

## **JOINNE LE JAMAATOU MOUSLEMEEN ET SO IMAM**

Dans bannes moments difficiles parfois bannes dimounes pose zotte bannes questions ki zotte bizin faire ? Alors si nous lire le Saint Coran et bannes hadices li facile pou trouve bannes réponses appropriées. Dans le Saint Coran Allah dire ki bannes serviteurs du Miséricordieux (*ebaadour Rahman*) zotte faire do'a avec Allah comme suit : "*Rabbana hablana min azwaajena wa zourriaatena qurrata a'yoniw wa ja'alna lil mouttaqeena immama*". So traduction c'est " O nous Seigneur faire ki nous bannes madames et nous bannes enfants vinne la douceur de nous lizié et faire nous vinne ene Imam pour bannes ki cultive To la crainte dans zotte le cœur. "Alors si Allah dire ene so serviteur à travers la révélation " Mo faire toi vine ene Imam pou bannes ki cultive Mo la crainte dans zotte le cœur", eski nou bizin étonné par ça quand nous finne dire bannes les autres Musulmans pendant plis ki 100 bananés ki Allah pou continuer envoie So bannes Serviteurs choisis pou guide l'humanité. Pou prouve ça et nous finne cite le verset " si jamais guide vinne cotte zotte de ma part alors celui ki pou suive mo guide pas pou gagne auquene crainte ni auquene chagrin"(SC 7 :39).

Laisse mo cite ou ene l'autre hadice cote ou capave apprécier ceki le Saint Prophète Mohammad<sup>saw</sup> finne dire lor ça sujet là. Finne rapporter lor l'autorité de Huthaifa b.Al-Yaman ki bannes les autres dimounes ti habitué questionne le Saint Prophète<sup>saw</sup> lor bannes bon moments mais moi mo ti habituer demande li lor bannes mauvais moments avec peur ki zotte capave attrape moi. Mo finne dire :

" O messenger d'Allah, nous ti dans l'ignorance et le mal et Allah finne apporte nous le bon temps avec l'Islam. Eski pou ena encore mauvais temps ki pou vini ?

Et li finne reponne "Oui "

Mo finne demande li "Eski pou ena encore bon moment après le mauvais ?"

Li finne reponne "Oui, mais pou ena aussi ene mal ki pou cachiette !"

Mo finne demander " Ki ça mal caché là pou été ?"

Li finne reponne " Ça l'époque là pou trouve l'arrivée de bannes dimounes ki pou adopter bannes façons de faire ki différent de mo façon de faire et zotte pou cherche guide ki différent avec ceki mo finne donner. Zotte pou conne bannes bons moments et bannes mauvais moments."

Alors mo finne demander "Eski pou enan bannes mauvais moments après ça bannes bons moments là "

Li finne reponne "Oui. Ene l'époque pou vini quand bannes dimounes pou diboute et pou invite pou rentre dans l'enfer. N'importe ki sanne là ki pou écoute zotte pour entre directement dans l'enfer."

Alors mo finne dire " O Prophète d'Allah décrire nous ça bannes dimounes là "

Li finne reponne " Zotte couleur la peau pou pareil couma nous et zotte pou cause nous langage "

Mo finne dire " O Messenger d'Allah ki ou suggérer mo faire si mo vivre dans ça l'époque là ?"

Li finne reponne "*talzamon Jamaa'atul Mouslemeen wa imamohoum*" ki capav traduit comme " Joinne le Jamaatoul Mouslemeen et zotte imam!"

Mo finne dire " Et si pena ni Jamaat ni Imam ? "

Li fine dire : "Alors sépare toi de ça bannes factions là. Alle vivre dans la foret même si to enan pou mange racines de bannes arbres et la mort trouve toi dans ça l'état là "(**Mouslim H 1847**)

Sans ki nous bizin alle lève ene polémique lor ki sanne là ça bannes dimounes là été, nou capav facilement comprend d'après ça hadice là

ki quand ena désordre nous bizin cherche le « **Jamaa'atoul Mouslemeen et zot Imam** ». Bannes mots ki le Saint Prophète<sup>saw</sup> finne utiliser c'est " *talzamon jamaa'atoul Mouslemeen wa imamohoum* ". Le mot "talzamon" vinne de *lazama* ki veut dire "alle forme partie de, vinne ene membre de, adhère à". Le Saint Prophète<sup>saw</sup> finne conseille le musulman pou li alle cherche ça Jamaat de bannes Musulmans là et zotte Imam". Nulle part nou pas pou trouver ki le prophète finne dire alle rode le calife de l'époque. Li finne dire alle rode l'Imam. Et pas ene Imam désigner par bannes dimounes mais ene Imam ki dire ki Allah finne faire li ene Imam pour garde bannes ki enan la crainte d'Allah dans zotte le cœur lor le chemin droit. Et ça Imam là li gagne so l'autorité directement d'Allah à travers la Révélation.

Azordi jour Le Jamaat Ahmadiyya so direction pas bon. Depi bien longtemps pé faire bannes erreurs bien graves pé vini même. Finne ignore bannes enseignements de Hazrat Masih Maood<sup>as</sup> et finne essaye remplace li par ene système cotte le Anjuman Ahmadiyya ena plis l'autorité. Zotte finne essaye retire le privilège d'Allah pou faire So Propre choix. Etant donné ki la plupart bannes Ahmadis bannes dimounes ignorants, alors li facile pou bannes chefs en place pou maintenir zotte mainmise lor ça Jamaat là en cachant la vérité ki trouve dans le Livre d'Allah et ki Hazrat Masih Maood<sup>as</sup> finne enseigne nous dans so bannes livres. Bannes dimounes ki vinne faire discours avec ou envie garde ou dans l'ignorance parski zotte même zotte ignorants. Zotte l'esprit finne former pou réfléchir dans ene certaine façon et zotte pas du tout disposer pou écoute ene l'autre point de vue. Zotte préfère enferme zotte dans zis ceki zotte finne appranne. Alors zotte continuer répète ou ki zotte pou continuer faire ceki zotte papa et grands papas ti croire. Zotte pas intéresser are rien de nouveau même si Hazrat Masih Maood<sup>as</sup> finne dire ki Allah pou continuer envoye dimoune ki Li pou nommer personnellement dans so Jamaat. Bannes dirigeant actuels du Jamaat rode faire ou croire ki Jamaat pas capave gâté parski ena le système de khilafat. Et pourtant Hazrat Masih Maood<sup>as</sup> finne faire nou comprend ki tout Jamaat gâté après quelque temps mais Allah finne faire ene grand Faveur lor L'Islam parski de temps en temps quand Li trouve li nécessaire Li pou envoye bannes dimounes ki pou faire les reformes nécessaires.

Alors comprend bien ki quand ou calife ou amir dire ou ki ou bizin obeir ou bizin faire zotte comprend ki ou pou obeir seulement ceki *ma'roof* (c'est-à-dire ceki conforme avec les instructions d'Allah et So Prophète). Si zotte menace ou d'expulsion ou pas bizin peur zotte et ou bizin faire et le calife et l'amir conner ki ou ena seulement la crainte d'Allah dans ou le cœur. Et ça la crainte d'Allah là si fort dans ou ki ou nepli peur personne so menace et ou pou faire efforts pou comprend et mettre en pratique seulement ceki Allah dire. Ou pou écoute calife et amir seulement quand zotte l'ordre pas contredire les ordres d'Allah. C'est ça l'enseignement de l'Islam. N'importe ki kikchose ki contredire ça l'enseignement là bizin rejeté pareil couma ou rejette kikchose ki sale.

Ki Allah aide bannes dimounes ki lire ça document là pour pratique la vertu et reste toujours lor le chemin droit.

La paix lor bannes ki suive ce ki Allah finne enseigner.

Zafrullah Domun  
Imam  
Jamaat Ahmadiyya Al Mouslemeen  
Les Guibies, Pailles  
Ile Maurice  
29 Zoul Hajj 1431/30 Novembre 2010